

# Der Medwescher TRAMETER

Det Saksesch Blied der Medwescher Himetgemeinschaft

Nr. 24 am 12. Johr

Bäluëch zem „Mediascher Infoblatt“

Nürnberg, am Dezember 2016



## Pandoras Biss

Pandora huët en Biss bekunn,  
ë Geschink fiur alle Mäntchen,  
dä am Wahn vergießén hun,  
sich Verstaond zè wäntschen.  
Wat äs än diër Biss dertän!?  
Zea saol des äng blewen!?  
Daot ergit norr dron e Sänn,  
wonn em Woehrit wul verstechen.  
Well eos Woehrit bläht Verstaond,  
die de Mäntsche känjgt befroan  
Hoffnungen ze baën af Saond  
uch de Zweifel ze beroaën.  
Wonn de Woehrit awer froa  
durch de Mäntschenhifter gistert,

äs sä nemestern mih troa,  
wat net jeden dro begistert.  
Woehrit määt Verstaond liiert  
äs en gaonz gefeéhrlích Mäsung,  
däräm äs des Wealt basiert  
af Bedreach uch Teschung.  
Alsi widd Verstaond gewiëschen,  
Bäs dreos Gluwe widd uch Hass,  
dä zesummen alles liëschen  
Wat dem Mäntchen maocht Verdrass.  
Wonn de Biss dron afgeschluëßen  
uch de Woehrit krecht än't Lächt,  
kaon eos dem Verstaond näst wüëssen,  
well die äs schiun längst verdreht!

vum Günther Schuster

## Heangdspillzech

En Heangd schnappt sich en hiesche Scheach und spillt dermät, bäs't äm geneach. Wä dett senj Härrenchen nea erbläckt, äs die vun desem net begläckt.



E lieft, nitt em de Scheach und baold wid et bäm Ubläck äm gaonz kaolt: Zebässen äs der Scheach total wat fiur den Heagd äs zwor normal.

Det Härrenchen äwwer gärre wiel, der Schooster repariere siel de Scheach und drit en em gleich duër.

Die segt, datt daot e Scheach iest wör und gitt dem Härrenchen ze bedinken: „Te kaost em uch den zwiëte schinken!“

vum Hans Otto Tittes


## Nogeducht

- Alles, wat ref äs, feht un ze fellen.
- Net jed Viujel, di eos dem Fejër kit, äs en Phönix.
- Allen Mäntschen sen gleich, mät äresglechen.
- Bäi allem wat eas stänkt, breochen mer vill Parfüm.
- E sot „- ställ Wasser äs def“ und sprung mät dem Hift beviur än den Porrel.
- Der Mäntsch flecht äm Urlef än de Sann und loat dron äm Schäden.
- Et gidd Gedonkensplitter, dä uch än't Uuch gohn.


vum Wolfgang Untch



- „Waram bäst tea ägespärrt?“
- „Well ech riëden...“



## Hellich Nuächt




Et äs gaonz reach, de Nuächt äs klör.  
Eos ener Kärz äm Bäsch trepst Lächt  
än't schär schiun eosgelufän Johr,  
daot sich äm deffe Schnie verkrecht.

Hiu iuwen af'em Dannebum  
heocht de Erännerung und schroat.  
Är Zehren flessen durch 'en Drum  
än diëm et teosend Belder schnoat.

Än deser Nuächt gefreßt de Zegt;  
Sä huët sich sealwst verliuren.  
Mät jedem Beld, daot em nea segt,  
widd uch e Stärn gebiuren!

Wonn dron dä Stärn um Hemmel glähn  
verzuwern sä mät Muächt  
eas Härzen, dä nea alle brähn  
und hellijen des Nuächt.



vum Günther Schuster

## Det wätzich Äk

„Te huëst äng behift, det Susi wer nōch sihr eanerfuëren“.

– „Äs et doch uch!“

„Schmarrn, et huët glatt entbeangden – vār Menet nō der Hochzeit“,

„Na segst te! Et äs esi eanerfuëhren, dat et nōch net emōl wiß,  
wā long em schwonger se mess!“

„Esi, esi... e Kängd bekist te als!“ söt der Vuëter hiftscheddelnd,

„und nea weallt tea dich wohrschenglich uch nōch froingdern, odder?“

– „Cha, ech wed jo gären,“ säfzt de Duchter, „wonn ich nor wässt wiën!“



„Ech ducht ängden, meng Frä wer mer troa.

Äm liëtze Menet se mer vu München ken Berlin geziujen.“

– „Na und?“

„Ech mosst fiëststeallen, datt mer nōch ängden den sealwen Bräfräjer hun!“

(Ägescheackt vum Wilfried Römer)



Zwin aold Saksen sätzen af dem Binkelchen viur dem Heos.  
Söt der in: „Wai, wai! Mir dean de Fess esi wieh, uch en Rëssen  
hun ech äm Kretz! Ech fählen mich richtig aold!“

Die aonder: „Ech fählen mich wā noa gebiuren! Nichen Hoor af'em Hift,  
nichen Zoingd äm Mel... uch än de Hius geschässen hun ech mer uch!“

(Ägescheackt vum Martin Lienert)

## Alles Geadet zem Noaen Johr

Ech wäntschen ech eos vuëlem Härzen  
vill Froad uch Gläck än desam Johr.  
Mecht Gott der Härre ech guër beschätzen  
viur allem Eagläck uch viur Kwuël.  
Mir stohn än sihr bedräften Zegden,  
gor munch en Heos äs froadenlius.  
Vill teosend Kängd sen ohnen Vuëter –  
hie schleft – sä sen gaonz vuëterlius.  
Hie äs geziugen äm eas ze schätzen,  
seng Heos uch Kängd uch't Vuëterlund.  
Nea huët än trofen en foandlich Kugel –  
hie äs verschweangden wä en Rius.  
Tea läwer Gott, vernemm eas Biëden,  
hier aller Kängder Wäntschen un,  
denn tea bäst Vuëter aller Wiesen,  
tea kaost än healfen dä zea Dir kun.



*Um 1. Januar 1945 fiurgedron aols Noajohrwäntschen vun (deamols 5 Johr aolt) Helmine Untch, gebiuren Mattes eos Wölz. Der Vuëter Johann Mattes word schiun un der Ostfront vermässst. Der Wäntschen stammt eos der Fädde vum Lihrer Gotterbarm vun Baußen.*

**De Redaktion vum  
»Medwescher Tramiter« uch »Mediascher Infoblatt«  
wäntscht alle Liësern en weangderhischen Chrästdaach  
uch en geaden, geseangten Rutsch än't Noa Johr 2017!**

(... Ach iwrijens, wie noch e Geschink breocht: Et gidd noch Medwesch-Bäjjer! Bitte af eas Homepage [www.mediasch.de](http://www.mediasch.de) gucken oder eangder der Adräss äm Impressum bestellen!...)

### IMPRESSUM:

Der MEDWESCHER TRAMITER verstiht sich als e Bliëd zer Verbridung vu Froad uch Spaß än easer sakscheschen Motterspröch!

**Ereosbroinjere:** Himetgemeinschaft Medwesch e.V.; Der irscht Chef: Gökeler Alfred (Freddy), Balingen

**De Steallvertriëder:** Buresch Horst (Mick), München; Ortwin Rill, Recklinghausen

**Redaktionskollegium Medwescher Tramiter:** Schuster Günther, Nürnberg (veräntfertlich) Sankt-Gallen-Ring 198, D-90431 Nürnberg, e-Mail: hg-mediasch@kabelmail.de; Dr. Drotloff Hansotto, Alzenau; Römer Wilfried, Augsburg; Untch Wolfgang, Talheim

**Layout:** Untch Wolfgang, Talheim; **Mätarbeeder & Logistik:** Buresch Klaus, München

**Erschengd än:** Närrembrich (Nürnberg); Wä oft?: iest odder zwiëmol äm Johr als Bälüëch zem Mediascher Infoblatt (awer nor wo genaech Legd, geneach Bädräch äschäcken).

**Dreack:** Digitale Medien GmbH, Heilbronn

Schräfftlich Bädräch bitte un de Redaktion schäcken. Numentlich oder mät em Signum gezichent Bädräch steallen de Minung der Verfasser duër und messen net mät diër des Ereosbroinjers iwerinstämmen.

Det Bliëd äs ämsonst, awer mer wedden es froan wo Sä eas mehrnor ewenich eangderstätzen, et mess net eabedainjd Giëld sen, awer vill Bädräch. Of des nea sealwest geschriwe sen oder irest feangden, äs allesint.

**Bankverbaindung:** Sparkasse Fürstenfeldbruck, Konto: 13 04 393, BLZ: 700 530 70,  
IBAN: DE81 7005 3070 0001 3043 93, SWIFT-BIC: BYLADEM 1FFB

